

Vedlegg til kongelig resolusjon 20.desember 2024 om Forskrift om vern av Stad marine verneområde

Vedlegg 1

Forskrift om vern av Stad marine verneområde i Stad og Kinn kommunar, Vestland fylke

Fastsett ved kgl.res. 20. desember 2024 med heimel i lov 19. juni 2009 nr. 100 om forvaltning av naturens mangfold (naturmangfoldloven) § 34, jf. § 39 og § 62. Fremja av Klima- og miljødepartementet.

§ 1. Føremål

Føremålet med Stad marine verneområde er å ta vare på eit spesielt kystområde på den inste delen av kontinentsokkelen utover frå land, med eit særprega naturmangfold, mellom anna korallar og store areal med tareskog og viktige oppvekst- og beiteområde for eit mangfold av marine artar. Det er ei målsetjing å halde verneverdiane utan større grad av ytre påverknad, og området skal kunne tene som studieområde for forsking og overvaking, medrekna som referanseområde for å kunne studere effektar av tarehausting.

Verneføremålet knyter seg til sjøbotnen.

§ 2. Geografisk avgrensing

Grensene for det marine verneområdet går fram av kart datert Klima- og miljødepartementet desember 2024.

Det marine verneområdet dekker eit sjøareal på 166,7 km². Verneområdet har grense mot land langs djupnekote 2 m under sjøkartnull for heile området unntatt der:

- a. grensene er trekt utanom fiskerihamner og annan infrastruktur
- b. vernet grenser inntil Dekkjene naturreservat; avgrensinga femner om tidevassona opp til middel høgvatt (normal flo)
- c. vernet grenser inntil Tungevåg naturreservat og Høgfjellet naturreservat; det marine verneområdet har felles grense med disse naturreservata i sjø.

Verneområdet femner om overflata, vassøyla og sjøbotn.

Det marine verneområdet omfattar følgjande gnr./bnr. i Stad kommune: 235/31, 245/1, 245/2, 245/3, 245/4, 245/5, 245/6, 245/7, 245/8, 245/9, 245/10, 245/11, 245/12, 245/13, 245/14, 245/15, 245/16, 245/18, 245/19, 245/20, 245/22.

§ 3. Verneregler

I det marine verneområdet må ingen setje i verk noko som skader verneverdiane nemnt i verneføremålet. Følgjande verneregler gjeld:

- a. Vegetasjonen, medrekna tang, tare og andre marine planter, er verna mot skade og øydelegging. Planting av vegetasjon er forbode.
- b. Dyrelivet i sjø er verna mot skade og øydelegging. Utsetjing av organismar er forbode.
- c. Området er verna mot tiltak som t.d. etablering av ulike typar anlegg, utfylling, byggeverksemrd, plassering av konstruksjonar på sjøbotnen, andre varige eller midlertidige innretningar, legging av røyrleidningar og kablar, utføring av avløpsvatn og andre konsentrerte tilførsler av ureining, utslepp av ureinsa ballastvatn, mudring, graving, uttak og deponering av masse, sprenging, boring, utslepp av kjølevatn frå land, omrøyring av vassmassar og oppankring. Forsøpling er forbode.

§ 4. Generelle unntak fra vernereglane

Vernereglane i § 3 er ikkje til hinder for:

- a. gjennomføring av militær operativ verksemd og tiltak i samband med ambulanse-, politi-, brannvern-, oljevern, rednings- og oppsynsverksemd (ikkje øvingsverksemd), samt gjennomføring av skjøtsel eller forvaltingsoppgåver som er bestemt av forvaltingsstyresmakta
- b. anlegg av mindre fartøysfeste for småbåt, medrekna fastfortøyning og dragfortøyning. Fortøyingsmiddel på faste fortøyningar må være i stein eller anna materiale som ikkje forureinar
- c. hausting av viltlevande marine ressursar i samsvar med havressurslova og anna gjeldande lovverk, med unntak for:
 1. hausting av stortare vest for Stålet inkl. området på sørsvida av Stad, jf. vernekartet, likevel slik at sinking av tang og tare ned til lågaste flomål for rettshavarar eller til undervisning er tillate,
 2. bruk av reiskap som slepast under fisket og i den forbindelse kan røyre botn, likevel slik at bruk av snurrevad er lov.
- d. tradisjonell låssetjing av fisk
- e. fiske i samsvar med lakse- og innlandsfiskloven
- f. jakt og fangst i samsvar med andre lover og forskrifter
- g. ferdsel med båt eller andre fartøy, og oppankring mot land for småbåt
- h. drift og vedlikehald av eksisterande sjømerke og andre navigasjonsinstallasjonar
- i. drift og vedlikehald av eksisterande sjøkablar og naudsynte reparasjonar ved akutt utfall
- j. drift og vedlikehald av andre eksisterande anlegg og innretningar
- k. oppgradering og fornying av eksisterande sjøkablar for å heve spenningsnivå og auke linjetverrsnitt når dette ikkje føreset vesentlege fysiske endringar som ikkje er i samsvar med verneføremålet.

§ 5. Spesifiserte dispensasjonsreglar

Forvaltingsstyresmakta kan etter søknad gje dispensasjon til:

- a. oppføring av naudsynte navigasjonsinstallasjonar og andre farleistiltak for å trygge ferdsla til sjøs
- b. legging av kablar og røyrleidningar, så langt som mogleg samla i korridorar
- c. oppgradering og fornying av sjøkablar som ikkje fell inn under § 4
- d. tilretteleggingstiltak for friluftsliv
- e. småbåtanlegg medrekna m.a. flytebrygger og fortøyningar
- f. bølgjedemparar og moloar i samband med småbåtanlegg
- g. tekniske tiltak som inneberer små inngrep på botnen og som ikkje påverkar dei marine verneverdiane inkl. vassutskifting og straumforhold nemneverdig
- h. vedlikehaldsmudring
- i. istandsetting, skjøtsel og vedlikehald av kulturminne
- j. akvakultur som ikkje er i strid med verneføremålet
- k. levandelagring av villfanga fisk inntil 12 veker
- l. uttak av framande, introduserte artar
- m. legging av nye avlaupsleidningar og utslepp av reinska kloakk.

§ 6. Generelle dispensasjonsreglar

Forvaltingsstyresmakta kan gjere unntak frå forskrifta dersom det ikkje strir mot verneføremålet og ikkje kan påverka verneverdiane nemneverdig, eller dersom tryggleiksomsyn eller omsyn til vesentlege samfunnsinteresser gjer det naudsynt, i samsvar med naturmangfoldloven § 48.

§ 7. Skjøtsel

Forvaltingsstyresmakta, eller den forvaltingsstyresmakta bestemmer, kan setje i verk tiltak for å opprethalde eller oppnå den naturtilstanden som er føremålet med vernet, i samsvar med naturmangfoldloven § 47.

§ 8. Forvaltingsplan

Forvaltingsstyresmakta skal utarbeide ein forvaltingsplan med nærmare retningsliner for forvalting og skjøtsel av det marine verneområdet. Forvaltingsplanen kan innehalde nærmare retningsliner for gjennomføring av skjøtsel.

§ 9. Forvaltingsstyresmakt

Miljødirektoratet fastset kven som skal ha forvaltingsstyresmakta etter denne forskrifta. Miljødirektoratet kan delegera styresmakta til kommunar som samtykkjer til det.

§10. Rådgjevande utval

Det kan oppretta eit rådgjevande utval for forvaltinga av verneområde.

§ 11. Iverksetjing

Denne forskrifta tek til å gjelde straks.